



PERBADANAN LABUAN

Wisma Perbadanan Labuan, Peti Surat 81245, 87022 Wilayah Persekutuan Labuan

Tel: 087-408600/087-408601 Faks: 087-428997/087-419400/087-426803

Laman Web: www.pl.gov.my

SIARAN MEDIA

UNTUK LIPUTAN MEDIA MASSA

PROGRAM CSR HARI WILAYAH PERSEKUTUAN 2019 –

SENI JAHITAN QUILT BERSAMA KOMUNITI WANITA B40 DI LABUAN

LABUAN, 15 Februari 2019 – Kementerian Wilayah Persekutuan dan Perbadanan Labuan dengan kerjasama Jabatan Kemajuan Masyarakat (KEMAS) Labuan hari ini menganjurkan program seni jahitan quilt secara percuma kepada 50 komuniti wanita B40 di Wilayah Persekutuan Labuan. Program Tanggungjawab Sosial Masyarakat (CSR) ini diadakan sempena sambutan Hari Wilayah Persekutuan 2019 ini dihadiri oleh YBhg. Prof. Dr. Zaitun Binti Abu Bakar, isteri Menteri Wilayah Persekutuan yang juga sebagai tenaga pengajar seni jahitan quilt ini.

Perbadanan Labuan turut menyumbangkan lima buah mesin jahit yang akan diletakkan di bangunan KEMAS untuk kegunaan komuniti Labuan. Kementerian berhasrat untuk menjadikan seni jahitan *quilt* sebagai salah satu sumber pendapatan komuniti Labuan pada masa akan datang. Kementerian juga berhasrat untuk menjadikan WP Labuan sebagai pusat penghasilan produk-produk quilt yang berkualiti tinggi dan dikenali sebagai produk tarikan pelancongan WP Labuan dalam jangka masa panjang. Sebagai contoh, apabila kita melancong ke Turki, kita pasti akan membeli produk karpet buatan Turki yang bermutu tinggi sebagai buah tangan.

Program CSR menjahit quilt ini juga adalah salah satu daripada projek di bawah Inisiatif Mensejahterakan Rakyat WP Labuan dalam memberikan peluang kepada warga WP Labuan menjana pendapatan sendiri melalui seni jahitan. Ramai warga WP Labuan yang kehilangan pekerjaan sejak kejatuhan ekonomi akibat kemerosotan industri minyak dan gas dunia masa kini.

Bagi perancangan masa depan, sebuah badan akan ditetapkan untuk menjadi agen pemasaran kepada produk-produk quilt Labuan ini untuk dijual di pasaran tempatan serta dikomersilkan ke pasaran antarabangsa. Hasil keuntungan kelak boleh digunakan untuk melatih peserta-peserta baharu di dalam bidang ini khusus dalam membantu rakyat Labuan sekaligus dapat membantu mengubah struktur ekonomi rakyat Labuan terutama kepada golongan wanita yang tidak bekerja.

Oleh itu, Kementerian berharap agar program-program Inisiatif Mensejahterakan Rakyat WP Labuan akan dapat memperkasakan peranan wanita dalam institusi keluarga dan masyarakat. Kementerian akan berganding bahu bersama-sama pihak NGO dan sektor swasta untuk memperkasakan agenda sosial seperti ini supaya dapat melestarikan kehidupan warga WP Labuan.

Disediakan Oleh:

Jabatan Hal Ehwal Korporat

Perbadanan Labuan

15 Februari 2019